

續修陝西省通志稿

第一百十三冊

卷二百十二

續修陝西通志稿卷二百十二

文徵十二

徵述四

清故修職郎候選州判副貢生曉霞董君壙記

趙元中

渭南

姻家董君諱春綵字曉霞祖籍朝坂濱河而居因其先子司鐸西安遂家焉曾祖載正妣氏徐祖對策字獻之以舉人官靖邊訓導妣氏徐考百齡字椿千以舉人官宜君訓導陞授西安教授妣氏嚴生三人君居長性嚴正篤孝友讀書得心解博學強識未冠入庠中年食餼椿千公春秋高君隨侍任所歷數十年代理諸務依依膝下始終孺慕居恆藜藿而堂上甘旨未嘗或缺迨親先後即世哭盡哀葬祭盡禮有古賢風家清寒以舌耕自給辛卯秋試受

知於同考李明府典試吳太史奇其文擊節歎賞而窘於額數僅
獲副車知者咸爲扼腕適吳公奉朝命督皖學邀君衡文居二載
賓主無間言君校文之暇猶爲子孫手抄經史錄科金陵歸途得
微疾擬明春旋秦竟不祿於學幕惜哉君原聘申氏元配李氏繼
劉氏再繼王氏子汝金庠生後伯氏娶張洪汝鈞庠生娶劉汝翼
幼後叔氏娶魚女三渭南趙慎修郃陽康維新其長次壻三未字
孫廬得孫女四君生於道光十年十二月二十三日卒於光緒九
年十月二日年六十有四汝金汝鈞至皖扶柩歸厝薦福寺二十
一年三月十三葬省南後坡寨新塋巽首乾趾因記其梗概刊石
而納諸壙

格言聯璧序

高岳崧

長安

因果報應之說愚夫婦藉以知善之當爲惡之當去而文人學士

或鄙之以爲冥冥之數不足憑故感應篇陰騭文諸書累千累百
幾成故紙良可慨已乙亥錦江彭述卿明府以金蘭生格言聯璧
見示分門別類數萬餘言所輯皆前言往行其旨不越乎性命身
心先以學問存養欲人知實踐躬行也終以惠吉悖凶欲人知禍
福感召乃自然之理有所惕而知所勉也明府曰書自金君蘭生
刊後鄞縣周君薇翹重刊之三河梁君治又刊之此本乃常熟許
君瀛洲所刊蓋四壽棗栗矣余將踵三子之後請君一言以弁其
首夫滔滔之世人之不能自立者多矣即因果報應亦孰知顧而
畏之哉而明府獨能棲心理域希志前賢殆所謂鐵中錚錚庸中
佼佼者歟吾願世之讀是編者視此編如感應篇陰騭文諸書廣
布流傳相觀而善尤願讀是編者毋視此編如感應篇陰騭文諸
書束之高閣不一寓目也斯則明府之意也夫

書董文敏墨蹟後

高岳崧

吾嘗論書晉人之書如來也唐人之書禪也宋人之書金剛也惟明董尙書香光兼而有之嘗以此語翰林諸公而莫余妄也噫此中三昧知之者誰乎書以竢深於臨池者

完穀山人墓志銘

白遇道

高陵

山人姓白氏命名遇道字悟齋號心吾改字五齋晚號完穀山人先世自山西洪洞遷陝西之高陵占籍焉曾祖諱庚祖諱玉梅父諱長潔生父諱長義世業農賈至山人以進士起家歷官至分守甘涼兵備道使者權甘肅臬司篆引年致事歸里未幾而神州陸沉矣山人少而儒壯而官老而民於是民皆笑之匪民者譏之斥之笑者曰子何民耶無懷氏之民耶葛天氏之民耶抑不識不知順帝則之民耶默無以應譏者曰子沃土之民耶瘠土之民耶抑

奇肱橫目醯鼠噉蟲之民耶暗不能應斥之者曰子頑民矣愚民
矣否則賊民矣亂民矣則應之曰愚頑所不辭也亂與賊則斷不
敢也於是民終卒於宣統三年冬十一月日距生於道光十七
年春三月日得年七十有四生壙係亡兒所營在邑城南三里之
杏王村元配墨先葬焉虛右以待予今十餘年矣或曰豫凶禮與
曰人各有心焉能掬以示人夫子曰朝聞道夕死可矣予於道未
聞不可死而不能不死者豈無說哉嘗撰書屋聯云人生不過百
年入世但求心不死今心已死矣存者僅形骸耳以後是否揜葬
則聽之後死者矣山人年三十四有子弱冠爲諸生年六十八子
亡遂無子山人同產有弟有猶子皆先亡山人有女子子五人女
孫一人或旣嫁而亡或待字而亡或中殤下殤而亡山人有續妻
小妻亦無不亡今有存者則再續之女妻也枯楊生梯幸得慰情

勝無之季女亦可云獨而不孤者矣嗚呼噫嘻而繫以銘

銘曰浩浩昊天今乃信其工陰陽爲炭兮萬物爲銅鑄成一錯再
難爲功悠悠蒼天今乃信其公禍淫福善恆性降衷何文詞如雄
富豪如崇才傑如融貴倖如通而皆莫能令終明明上天今乃信
其空似續妣祖應各不替宗風或子孫衆多而羽戢斯螽或珠生
老蚌而夢沿維熊則有延陵子卜子夏東門吳鄧伯道何居乎子
之來而清侔雛鳳子之去而飛類冥鴻豈皆李長吉修文上天石
曼卿芙蓉城中本無心成化非關道有汙隆鄙意與其有苗而不
實不秀毋甯獲石田而不生不育此理難質諸蒼穹嗟予樗朽憚
怒天逢裂冠毀冕昏椽內訌耗斲下土偏丁我躬祈死無祝送終
匙僮王孫羸葬甘飽沙蟲而庭堅不祀若敖鬼餒焉能無怨無恫
職思其居憂心忡忡眸子旣眊視天夢夢爲斯民生斯世倘子與

氏所謂天下之窮他生如可卜也似此等運命願勿雷同

彊梧大荒落之歲山人自譔

待盡以來歲又八易大命不傾人間依然眊息悔恨平生不德殍
及兩宗雖復自怨自艾究覺死有餘辜仰荷昊慈不絕人祀則有
亡兒忠善同曾祖之長兄忠謦年及艾矣粵以戊午年建寅之月
吉日良辰獲抱一孫四世開祥掌珠比珍謦姪生有至性念鞠子
哀慨然願與亡兒立後將來爲山人承重曾孫雙奉兩宗禋祀意
甚盛也夫名宜先正子誠不爲衛君孫必當立子嘗以語言偃煌
煌聖訓天地爲昭宜遵而行之者爰乃上告祖宗旁諮戚友詢謀
僉同即日抱家撫養小字阿寶派名傳心今而後山人無復事矣
百年後亦可以瞑目矣己未夏六月入伏日山人親筆又記時行
年八十有三歲

清故通議大夫花翎三品銜雲南普洱府知府縉卿劉公暨

原配陳淑人合葬墓志銘

宋伯魯

醴泉

公諱雲章字縉卿號石橋陝西臨潼縣新義里劉氏曾祖楸祖興和考文煜號熙菴三代皆以公貴封資政大夫妣皆封夫人熙菴公有三子長即公也次潤章次炳章公敦敏侃直能文爲諸生試輒冠其曹同治癸酉年二十八舉於鄉甲戌聯捷成進士以即用知縣發雲南總督劉武慎岑襄勤一見奇其才檄署江川通海尋授保山縣擢鎮雄知州丁父憂去職服闋檄署昆陽知州授甯洱縣邊俸滿以勦辦猺黑悍匪功賞孔雀翎復以大計卓異升授廣西直隸州調署景東直隸廳武定直隸州元江直隸州署曲靖府知府順寧府知府授普洱府知府旋丁繼母惠夫人憂去職不復出公之來滇也亂始平散勇餘孽叛服不常而漢夷羈處之區開

衅尤易各屬土司勾結悍夷往往嘯聚千人或萬餘人焚殺劫奪至不可制大吏稔公有膽畧以討賊委之公獎率士卒躬冒毒瘴蹈深箐破其巢薙其頑梗而撫其餘衆不兩月大定又滇自經亂賦額糾紛無舊籍而吏胥舞文莫可究詰若保山之逋負鎮雄之包納昆陽之重賦甯洱之額征公件至溢正供十倍而廣西州屬彌勒尤重公至則爬梳積弊已責紓艱而民困大蘇又饑饉之後倉庾空乏而夷黎尤彫剝莫之卹公賑糶兼施每歲春秋放斂吏無需索而輸將皆如期而至犒以牛酒皆歡呼感動有垂泣者公忠信廉明所至興學校却陋規裁兵節饟士飽而民不擾善聽訟敢決無所畏蒞其治昆陽順甯廣西也以能摧折彊禦著旋以母憂去職以民國五年舊歷二月五日卒於家享年七旬有二公性節約生平不御華綺而恆出所羨以利人尤好善舉光緒庚寅甯

洱疫大作集資延醫設藥局所全活無算昆陽逼近滇池久淤民
失利鳩七千餘工鑿通之又造甯洱聯陞順甯利濟兩橋而民不
病涉篤內行以王父母父母不逮祿養思之每泣下忌祭茹素以
終其身事繼母惠如所生昆弟之間怡怡如也娶陳淑人同邑孝
廉城固教諭楮山君長女婉慤淑慎事尊章以孝聞公之官滇也
簿領殷湊而閫以內部勒井然嗇於自奉而骨肉戚鄰則常飲之
無吝色以己無所出撫妾子如己子長元普溫氏出次兆普楊氏
出出爲弟潤章後均法政畢業生女二待字楊氏出淑人以光緒
二十八年月日先公歿於曲靖府署年六十有一哭者皆失可
以見其賢矣民國五年舊歷月日葬公於某原陳淑人附銘曰
奕奕文洸洸武臨躋鄉耀昆潄翦鯨鯢柔猘獮三精塞九疇恭御
雲輶超世詈昌爾後德之輔勒貞石慰終古

孝女淑貞壙記

宋伯魯

孝女淑貞者吾友裕君子延之長女也生而淑惠年二十二以疾歿於平涼之虜民國六年二月十二日也子延夫婦哭之痛既瘞於長安城東南芙蓉原先塋之側屬予爲之記曰予以光緒丙午四月赴烏孫歷天山瀚海丁未入關又赴西甯馳驅萬餘里吾女未嘗不在側及予筦權狄道金家崖華亭也女告予曰今所取皆商民脂膏也大人曷少紓之使民得養其力乎予卒用其言商民稱便往歲九月予宿疾作數瀕於死女侍湯藥不交睫者十數日每夜焚香禱天祈損年齡以益其父已而病果差女喜曰上天其許我矣及女歿距予病僅一載而予乃健飯猶昔嗚呼天果減女年以增余耶是耶非耶女幼而明慧稍長能讀莊子列女傳至兩漢三國志諸稗官皆能通其義年踰標梅而未嘗有鬱然之色日

續陝西通志 卷一百一十二
惟臨歐帖時或以淡墨寫山水小景以自娛樂能爲絕句嘗爲秋江釣艇圖自題其上曰鴻雁南來數點飛蕭蕭蒲葦颭斜暉落紅滿徑無人掃一葉扁舟何處歸其志趣可知矣是年其兄及弟亦相繼物故予夫婦垂盡之年遽嬰斯慘豈復有生人趣獨念吾女有大過人者不可以弗誌子曷爲我衍之以塞吾之悲子延之言如此予與子延兄弟自成童訂交迄今數十年中痛癢如親手足改革後六年子延始由平涼歸無尺椽之庇租屋以居環堵蕭然旣傷其子女則夫婦日夕啜泣厭其生予數往慰之輒爲予道其女淑貞之賢孝聲淚俱下也予故哀其志而述之如此

中華民國故陸軍中將陝北鎮守使鳳岡張公墓志銘

宋伯魯

歲乙卯六月張公鳳岡訃至京伯魯爲位而哭已而其嗣子鈞馳

狀來告葬且乞銘墓余與公周旋久稔知公而又身丁改革創鉅痛深烏得而無言自清室末造綱紀廢弛內憂外患日急革命之說益囂囂而無所憚朝廷百計逮捕誅斬弗能禁浸淫崩潰不可障救迄於辛亥八月而武昌之變作矣鳳岡少有膽畧善刺擊光緒中入陶勤肅公營轉戰西甯新疆積功至都司後充陝西陸軍混成協司號官輕財尙然諾賭時日非陰結死士有澄清之志及武昌變起公謂時不可失乃密會諸豪俊剋期舉事九月一日遂以全協據西安城推張公鳳翔爲都督通電武昌是時城中大亂公安民部衆簡軍實招賢俊日不暇給而都督英鷺沉毅善馭下部將旣衆獨倚公如左右手至是以公爲調遣兵馬總司令是時海內響應豪傑蠭起朝廷度不能制乃頒共和之詔許遜位而新授陝西巡撫升允獨以甘肅一隅倔強西北潛師東襲十月陷長

武進逼邠永時秦軍悉精銳備潼關而公所部皆新募饑械單絀倉卒出禦敵連戰皆捷及冉店橋諸將失利公大呼陷陣所向披靡甘軍不能支遂收長武十一月河南毅軍陷潼關會城告急公星夜赴援於是邠長再陷及會城解嚴復督師守乾州與甘軍相持百餘日大小數十戰城無完堞死傷枕藉公日夜督戰礮彈如雨下卒不能近衆咸驚以爲神民國元年正月共和告成詔書至始各罷兵三月大總統策令特授公中將補秦軍第一鎮統制十二月改第一師師長二年秋蓋屋郿縣土匪起鳳翔軍潰皆討平之授二等文虎章三年三月白匪陷商南縣犯大峪殘蓋鄆麟遊一帶會城戒嚴都督率所部出藍田而河南趙護軍倜亦奉中央命來會勦各軍皆出以公留守公部卒僅數千晝夜干揪勤動周匝人心大謐旣而白匪西竄陝境以甯張都督除揚威將軍入觀

而咸武將軍陸公來蒞陝見公大悅一切皆任之不疑八月改請
任公陝北鎮守使尋授三等嘉禾章四年六月以咯血舊疾作卒
於軍年三十九事聞命以上將例從優議卹公驍勇多智謀善戰
能以寡敵衆諸將莫能及然好文學嘗延諸名流令講論孟諸史
或縱談古今名將事蹟傾聽忘倦暇則習擘窠大字曰以此收斂
身心創同志小學堂施醫藥衣糶賑振乏絕推解一無所吝蓋其
天性然也公諱雲山鳳岡其字曾祖祥祖清貴父玉信妻劉無出
以兄之子鈞爲嗣世居長安南鄉新莊以舊曆八月六日卜葬於
村南新塋乙首辛趾銘曰

六百之會羣海飛高匡隅目相髮髯櫛櫛梗梗爭持頤公獨欲切
如有餘撻拂批竊功不居枕籍橫戈何晏如耿耿大廈風雨危胡
不少留公安之尺土封斧爲子廬轍羈涓灤空涕洟

李西庚先生像贊

宋伯魯

彼石嶢嶢惟其介矣彼澤綿綿揚於夫矣偉哉先生抱素居貞以牖蒙僿率彼菁英孝哉先生盡歡菽水數瀕於危庶無怠弛曰恭桑梓懇懇在公惠及枯骼推於疚癘影堂有恤晬容斯在洞洞屬屬如聞警欬昔銘君墓言闡厥徽敬瞻遺像噫杜德幾

陝西新城小碑林記

宋伯魯

陝西爲漢唐故都碑版流傳好古之士視若球圖而開成石經尤爲焜耀古今自宋呂龍圖移置府學後遠近傳鈔無虛日漢石經旣不可見此遂爲絕後空前之寶物其後好古者之蒐羅與夫時時出土者日益夥清陝撫畢秋帆尙書就石經所在拓其地爲碑林凡三輔著名劇蹟靡不入焉空齋書靜登登之聲不絕誠盛事矣丁卯冬吾宗明軒主席以文武之才來治於陝軍書之暇汲汲